

LOCAL

Betico

Bo bida y logronan lo keda semper den nos curazon

Cu un edad hoben di 30 aña, pero madurá caba el a drenta política, no di su propio boluntad, pero dor di especuladornan cu a weita e potencial liderasgo di su hacer. El a confrontá su amigonan musicante cu e noticia di a wordo asercá pa participá riba lista político. Na e promé encuentro e no tabata mucho entusiasma pa drenta política, e tabata mas será cu tocamento di Guitara, Piano y tur loke tin di haci cu música y su famia. Ta su amigonan músico a curashé pa e drenta política y nan lo yudé tur loke nan por pa e ser un político renombrá. Mas pa complacé su amigonan cu complacé su propio deseo el a aceptá e reto pa postulá su mes riba lista di e partido AVP na aña 1967.

Como maestro di skol e ta dominá e manera habitual y trankil di presentá su mes cu palabranan y frasenan bibo di expresion, na un manera único, cu rapidamente tabata distingui su cualidadnan superior entre e otro politiconan di partido. E sistema suave, trankilo di anda cu tur hende, tabata visto y cla cu pronto e ta bai asumí puestonan halto den e partido político di AVP. Su coleganan di partido a cumenzá brota abiertamente cu alafin nan ta weita un figura político di clase den partido y di mes nan a cumenzá acoplá na su pensamentonan y tabata aceptá su hacer como gufa pa futuro di nan partido. E acoplacion aki a bira asina fuerte, cu cierto coleganan di partido AVP tabata asina entusiasma y decidido pa nombré como lider di partido. Sinembargo e gesto no por a pega y a caba na arros con coco, pasobra e partido AVP ta strictamente reservá pa famfa Eman pa ser lider. E asunto confuso y tenaz aki a bin te dilanti Huez. Sinembargo e partido AVP a keda solitario cu e famfa y despues a casi caba den cabamento di e década ochenta.



Consecuentemente e lider Betico Croes a funda su mes partido "Movimiento Electoral di Pueblo" (MEP) dia 9 di Februari 1971 na su cas Cumana 84. E lider Betico a integrá e Partido Union Nacional Arubano (UNA) den su Movimiento Electoral di Pueblo. E partido Union Nacional Arubano tabata un rival fuerte y continuo di AVP, desde e década cincuenta. E partido nobo aki a haña e nomber di e "Partido Geel" pa color di su bandera y asina e partido a tuma rienda poco poco pero sigur y mantené su puesto di Partido mayoritario di Pueblo Arubano, te hasta awe na década nobenta. E lider a desplega liderasgo, madures, perseverancia y tolerancia durante su bida político ta cu aña 1985, hamas visto promé na Aruba. Hopi di su luchanan tabata mustra casi imposibel pa realizá, pasobra prensa Arubano y Curasoleño, gremionan di Aruba y Corsow y algun sindicato di Aruba y Corsow tabata lifica recta contra su deseonan. Gobierno Central na Corsow y Gobierno Hulandes tabata colaborá pa destruí su imagen den Pueblo Arubano. Oposicion Político na Aruba y Corsow tabata manipula cu otro pa mantené e gran lider for di poder gubernamental. Nan tur hunto tabata contra su deseo, sinembargo nunca el a capitulá o bende deseo di su Pueblo. E tabata forma y kibra Gobierno na su antoho, hopi bes pa cosnan hopi simpel, pero cu ta principio y ta comprometé su Pueblo pa futuro. E único speranza y alternativa den su lucha, tabata e Pueblo Arubano cu tabata animé den su lucha tenaz. E Pueblo Arubano a bira asina hostiná cu ya nan no tabata kere ningun prensa, ni radio. Ta solamente Betico na palabra sea na television o na encuentro político nan tabata kere aden y asina Betico a bira e ídolo di Pueblo cu no tin nada pa retrose su actividadnan político. Loke e bisa ta ley, loke e bisa ta berdad pa Pueblo, loke e kier Pueblo ta aceptá sin mas. Corantman, radio y Tele-Aruba a bira manera prikichi pa documentá Betico tur dia, pasobra nan tabata sa, cu contra Betico ta contra nan mes y nan no por existí sin notica di Betico y su Movimiento dinámico pa cu su Pueblo. □